

NOTFAU: Yari, 12j.



suechet ganz dringänd äs nöiis Daheime mit Freigang

Hoi Du,

Wer bisch DU? IG bi dr Yari, das isch kurdisch u bedütet «Liebling». U ig möcht DIN Yari wärde, ig sueche nämlech ganz dringänd es nöiies Daheime. Ig bi aagfahre u zum Tierarzt brocht worde. Dört hei sy mi versorget u itze isch aues fascht verheilet. Mini Bsitzer hei sy ou uusfindig mache chönne, di wönnt mi abr nüm zrug. Itze bin ig ganz allei uf diesere Wäut. Ig wohne im Momänt bir Tierärztin, nur isch di demnächst i Ferie. U denn? Drum!

Ig bi 12j., kaschtriert, wärd grad no gimpft, gsung (Bluetbiud isch gmacht u sieht guet us, s'Bei isch ou fascht scho i Ordng, nur villiicht mini Zähnli, dört luege sy grad no), schtuberein (ig cha grad nid usse, geh abr immr brav uf's Chischtli), sähr lieb u mönschebezoge. Mini Hobbies sy: Schmüsele, Chuschele, Chräbbele. I dere Reihefoug! Ig liebe das, am liebschte de ganz Tag lang. S'Schpiue bin ig grad am Entdäcke, villiicht chönnte mir das zäme mache u Du zeigsch mir, wie das richtig geit?

Ig hätt eifach soooo gärn en eigene Mönsch (oder ou zwöi), die wo sech um mi chümmere u zu dene ig denn ghöre. Bi dene ig ufm Sofa höckle dörfti u di wo mit mir schmüsele u mi lieb habe u mi versorge. Eifach es eigens Daheime, wo ig wiuchomme bi. Ig bi so pflägliicht u gnüegsam: Fuetter u es Chörbli u tägliche Schtriicheleiheite. U Freigang ir verchehrsarme Umgäbig, das muess sy. Das bruuche ig, abr ig geh nid wiit, ig bliibe bschtimmt ir Nächi. Wiu ja min Mönsch nid nomou verliere. Chliini Ching, Hung u angeri Chatze wott ig liebr nid im Daheime. Grösseri Ching sötte cheis Problem sy, bi ganz en Liebr.

Ig dänk, ig bi es perfäkts Büesi für eis/zwöi älteri Persone, wo fascht immr öppr daheime isch zum VIU Schmüsele. Liebsch Du's ruhig u entschannt u hesch Du Chatzeerfahrig u viu Ziit? U dörft ig bi Dir Alleiprinz sy? U wohnsch Du ire verchehrsarme Umgäbig u hesch Du villiicht sogar en Garte? MIN Garte? Ja? Das wär's! Denn müesset mir üs unbedingt lehre chenne. Ig wohne im Moment no z'Aarberg/BE, züggle aber gärn zu Dir, wo ou immer Du wohnsch. Mäud Di doch bitte ganz gly bi dr Sonja Ball. Sie het sich mir agno u suechet für mi das nöiie Plätzli. Mir pressiert's es bitzeli. Ends Ougscht geit mini Tierarzt-Doseöffneri i Ferie u denn bin ig ganz allei u weiss no nid, wohere. Drum!

Din Yari



Katze sucht Mensch - Mensch sucht Katze

Sonja Ball

Tel.Nr. 079 333 45 62 (Mo-Fr 18-20h)

kontakt@katze-sucht-mensch.ch